



Anwar bersama penulis buku *Hikayat Hang Tuah*, Muhammad Salleh pada Seminar Kebangsaan Penerbitan Buku Berbahasa Melayu di DBP, Kuala Lumpur, semalam. (Foto Eizairi Shamsudin/BH)

'Beri kebebasan berkarya'

Kuala Lumpur: Datuk Seri Anwar Ibrahim menekankan kepentingan memberi kebebasan kepada sasterawan dan seniman untuk berkarya bagi menghasilkan karya kritikal yang membina kepada negara.

Perdana Menteri berkata, curahan melalui karya sasterawan atau seniman tidak boleh diukur dari sudut yang terbatas.

Beliau berkata, perlu diberikan ruang yang lebih terbuka untuk mereka berkarya yang menuntut satu suasana kebebasan yang lebih luas.

Katanya, jika tiada ruang diberikan kepada kumpulan itu maka mereka akan berasa terkongkong dan membataskan karya serta tidak dapat memberikan kritikan membina terhadap politik, budaya, masyarakat dan sejarah.

"Kita negara merdeka bukan terjajah maka mesti memberikan ruang sedikit untuk mereka berkarya dengan bebas

"Jika dunia terlalu mengong-

kong, maka karya yang dihasilkan akan terbantut," katanya dalam ucap tama Seminar Kebangsaan Penerbitan Buku Berbahasa Melayu di Dewan Bahasa dan Pustaka (DBP) di sini, semalam.

Anwar turut memberi contoh bagaimana boria Pulau Pinang yang asalnya satu hiburan dengan muzik yang hidup dan segar, kini dilupakan kerana ia dijadikan alat menyampaikan propaganda.

Katanya, satu masa dulu boria memberi mesej sangat kritis kepada masyarakat, budaya dan kepimpinan politik.

"Sebaik dijadikan corong budaya yang terbatas sebagai alat propaganda, maka ia membuat sangkaan dan tidak menghasilkan boria tradisional yang sangat indah dan bersahaja kepada pendengar yang mana rakyat menerimanya dengan baik satu masa dulu," katanya.

Perdana Menteri berkata, kebebasan yang sama juga ditekan-

kan dalam pendidikan di sekolah dan universiti yang sering kali ditekankan sebelum ini.

Katanya, kebebasan ini akan melatih dan melahirkan generasi yang berfikiran kritis dan mengembangkan pemikiran yang lebih kritikal.

Mengakui ruang kebebasan yang diberikan akan membimbangkan kerajaan, katanya sebagai pihak penguasa maka perlu ada kebijaksanaan serta kesabaran dalam menanganinya.

Anwar turut membangkitkan kebimbangan mengenai kemunculan budaya sosial baharu dan teknologi yang menghakis budaya membaca.

Katanya, kebimbangan itu sudah wujud lama malah ketika beliau menjadi Menteri Pendidikan pada tahun 80-an

"Justeru, DBP perlu menganjurkan lebih banyak program menggalakkan membaca yang tidak hanya memberikan buku tetapi mengembalikan teknik membaca secara klasikal," katanya.